

琴

隱

園

詩

集

琴隱園詩集卷十三

武進 湯貽汾 雨生

北塞集

辛巳

年四十四起靈邱至應州入雁門至代州大同雁門至太原代州止

兒輩習射

世無飛衛咎君謨猿臂愁看燕角弧幾見師能賢弟子從來武必備文儒爾曹且學心中正此事非關力有無莫羨而翁穿葉手持竿方擬去江湖

文丞相松風鑪歌

并記

鑪之製銅三片似瓦上廣下狹別一底各有鈎合之而成鑪高可四寸析之便于行篋正面古篆松

風二字左旁文山製三小篆予以錢六百得之并  
門市中泐雨生寶三小隸于右旁風口上考公故  
物如玉帶生蟬腹硯景炎琴之類俱見前人題詠  
獨此鑪無聞因爲作歌

我生金石耽成癖況此忠貞手遺澤妙非九層非七寶三  
片昆銅製奇特合如敦彝散餽璧小承鐙杓大金鬲雙環  
日月靜旋轉三角蓬壺聳芳嶺松風古篆題文山勁筆非  
同鄭苗刻

苗五代時打錫人嘗打  
酒瓶白篆字于瓶上

并州市兒熟馬湏到眼

驚看古色碧嗜古人希問價廉典琴適得八省陌歸來棐  
几感徘徊出示騷人欣拂拭可憐天水金甌失餘燄無人  
延火德死灰一息賴公存熱血忠肝千載赤平生故物賸

琴硯五百年來人愛惜此雖流落尙依然不共銅駝沒荆  
棘昔公作此儻有意此物從來節不易象取旣濟志防患  
剛德終期鬼方克豈知婦弟竟喪亡厥象凶占離日昃錚  
錚肯共焦頭額義之所在湯火卽零丁海水酌難堪板橋  
樵飡乞不得劍淅矛炊幾生死齧雪吞毡終鐵石區區此  
物同公身不壞流傳至今赫流傳萬古人人識莫更摩挲  
三嘆息生難赤手和梅羹死愈黃冠煉丹液相逢且用憂  
煩滌活火清泉手親炙松枝槐葉拾添薪鶉鴿胡桃不堪  
憶清波雜誌南渡後有司降樣  
置御鑪炭胡桃紋鶉鴿色颼颼尙作清原風閩中何氏藏公  
琴上刻公詩云松風一榻雨蕭蕭萬里封疆不寂寥獨坐  
瑤琴遣世慮君恩猶恐壯懷消後題時景炎元年蒙恩遣  
問召入夜宿清習習從生玉川液念爾從公經幾年幸離  
原寺感懷之作

土室猶燕北西臺如意橋亭硯各有聲名爾胡默爲爾悲  
歌淚似泉歸來好共江南客

予與黃次臯

憲臣

明府皆交千波有年而不獲相聚

千波欲合寫三人小象未得先使予作一圖予以  
千波自號滄浪漁父爲寫滄浪漁侶圖題之

不繫舟憐一住難幾時同把舊漁竿聊將一片雞窗夢付  
與旁人作畫看

自題桃柳小景

二月成州柳未舒江郎斑管凍難噓紙鳶風裏花吹面憶  
煞清明放學初

三月廿四日佳臺作

風雨連朝罄舊醅日長誰與話層臺憑欄祇自愁春去那  
識春還未到來

過渾源飲赤簫鴈齋

多謝殷勤小宰羊不辭酩酊數登堂比鄰鵝鴨都無擾知  
是歧亭愛季常

東坡訪季常于歧亭先以詩戒季常殺生歧亭人多化之今君從予戒殺已久

應州食鰕

幾年鹵饌嘆無魚此日清醪味有餘車轍豈君求活處洞  
庭猶是畏閒漁

呂覽洞庭之鰕鰕卽鰕也

過山陰

雲中一郡九州縣匹馬三年今歷徧山陰之陽山復宿西  
連勾注東夏屋

山名里巷無知太保王明王文端家屏有復宿山房收樵

誰識魏朝堂

邑在元魏爲南平城亦曰新平城常行幸焉

只言都尉今頗牧

張定

邦

卻問鄉關是夜郎夜郎去此萬餘里骨肉安知孰生死

男兒裹革亦良圖太平何苦沙場孤君不見川明土秀山陰道來往游人鏡中好一棹烟波不見塵看山穩臥鱸魚飽

繁峙道中

山村柳絮天稚子習耕田飯罷日亭午人牛相對眠

邊俗午臥

曰歇晌過午而起曰起晌

平刑關別大女簫

平刑關關門不關關尹閒涕洟滿關尹鰥可憐新婦癡井曰尙未嫻上堂見新婦梳頭十指寒霜刀不能握何以爲

耕餐可憐新婦單努力承翁歡阿耶那得長來看耶今來  
此還因官出關回首關雲隔差悔當年嫁渠急青山卻笑  
向平疑只恐無時理游屐

辛巳四月六日爲先太恭人七十生日汾適于役應

州及還靈邱於二十六日齋居大雲寺僧誦金剛

經一日太恭人晚年常誦高王經汾是日誦此經

百遍又書一帙畱寺中且題其後兼寄妹於漳州

峻欽柳州嗚呼昔萬敬儒廬墓十八年刺血寫淨

屠書至斷手三指豈定惑於輪迴超薦之說其思

親之誠蓋有無可奈何者汾母葬十年未嘗省視

不孝之罪孰甚於此向寄峻欽詩何時丙舍就歸



隱卯君俱今此詩亦猶前意也然此願卽遂亦爲敬儒所不齒矣痛哉

痛兒失母歲十易刺血寫經求不得吾母若存今七十痛  
母棄兒頭未白兒今痛母母豈知梵經猶是生前持生前  
乞佛生慈悲解脫孤兒阮病癡撫兒誨兒不見兒況今萬  
里分連枝一兒瘴鄉南海湄一兒五載投邊郵兒今那得  
齊昌酒重向花前稱母壽六十稱壽時在興甯痛絕華堂絲竹音變  
成蕭寺鐘魚吼兒今乞佛告兒母兒暖兒寒知憶久萬死  
空存伏墓心一生枉冀西河守兒髮星星亦垂老漸識柴  
桑蓮社好長齋繡佛守松楸寄語鴿原悔不早今日何日  
天際頭圓通片偈傷心留東坡病回通寺他老泉忌日寫寶積巖蓋頌佛一偈贈長老仙

公  
千年看取孤兒淚莫論樗寮字劣優張卽之有金剛經墨蹟欸識消佑六  
年季夏朔其父諱日所書有元明嗚呼此字他年有磨滅  
以來名人題咏近爲王文圃所藏  
此恨終天無日畢

一枝亭坐花

綠綺含情冷自揮紅亭獨倚又斜暉絕交靜喜門羅雀拊  
髀閒憂馬病肥不俗卽仙無那老是貧非病總應歸無聊  
只共花枝笑一片吟魂化蝶飛

牧羊

北山草短南山長他人牧牛我牧羊牧羊苦天明出門饑  
過午饑時探懷餽飽僵帶雪寒吞不得煮不辭風雨況寒  
暑只畏山深有狼虎虎甯食我莫失羊失卻一羊難見主

牧羊樂頭上煙雲腳底落羣羊食草我閒眠但遇樵夫笑  
相謔有廬人束茅有田人把鑿擔薪汲水應門戶萬事不  
勞心上著日日斜歸一宿到老何須入城郭嗚呼牧羊  
苦樂誰能識但要羣羊適其適正當四月五月青卻望千  
山萬山白家家有羊有牧人羊瘠羊肥牧人責借問何人  
牧最良請君試歷山南北

覺山石得水而活蓄之池則草樹自生辛巳五月使  
健兒勵得一峯置之琴隱園

松亭一笠千山鎖塵自網人山網我看山眼大陋平泉甲  
乙羣頑誇磊砢今朝覺山來老樵說見一石如樵高穿風  
透日洞窗戶幽探冥索窮猿猱顛心欲詣空山拜那得飛

來元圃外健兒意氣亦崢嶸願挾蓬萊左股大山靈喜接  
青城使玉女開扉丈人起修成陶隱詣王宏笑絕冠纓奔  
倒屣清泉浴出趺瘦仙白鶴蒼松相對閒卻將亭上看山  
眼注向盆池淺草邊君山洞庭縮本細老翁等學兒童戲  
非時慙舊發奇葩不用撮土榮根蒂前有奇章後米老仇  
池雪浪同珍寶巧偷豪奪盡成空萬古惟留詩句好我詩  
警石石甯聞爲記雲巖與後人今日君賓我爲主他年君  
主更誰賓不嫌賓主多翻覆石友生平只嫌俗若使尋常  
向醉人路旁甘受熊渠鏃

靈邱官舍營暖室一間大書耐字千戶

有序

物不擇地而生者千萬而獨遺乎吾今所居之地

若相戒而避焉曰地瘠而寒周也然瘠不生有異  
產寒不習而宜寒無論蠶穀禽魚蔬藥之眾卽草  
木之梅竹冬青忍冬之不擇肥壤不畏霜雪人且  
其譽爲耐寒者而此亦無之吾偶致盆篠於遠方  
冬則寒死又致之藏諸地室歷數年無孫枝雖有  
松栢而寒則黃落凡所謂耐寒者固皆不能耐於  
此土耶而吾以淺學促中之人卽東南大邑通都  
居有亭榭之美游有山水之雅朋有觴咏之歡室  
有圖書之富口腹有尊鱸之適耳目有絃歌之娛  
猶且日及蜉蝣數時弗戀白衣蒼狗一瞬無羈故  
方簪忽褐乍轍卽帆靡有恆居亦無定相其無耐

也甚矣於此而吾能耐之耶然來且五年榮悴非  
故忘也嗜好非故屏也交游非故絕也求所謂東  
南之可樂而不可耐者無萬牛之一毛亦何故而  
轉能以不耐於彼者耐此也且耐者非一寒耐之  
飢耐之束縛耐之勞勩耐之淒寂耐之疾病耐之  
毀耐之侮耐之其於奔走也耐風雨冰雪之虐塵  
土糞穢之汚高嶺巨川之險蹄歷軸折之驚及酬  
接於人而語帶羶酪坐尊溷圀把臂猝同角抵掉  
頭倏如散倡唾非怒而至面刀不見而殺人其遇  
塗而呼來者曰寵踞床而受拜者爲恩是皆素而  
旣耐耐卽強而必爭夫四時不能不更者天之難

耐也滄田不得不變者地之難耐也水火兵刃不  
得不卻者人之難耐也然使水火兵刃而蹈於義  
吾不惟來而耐之亦且趨而卽之蓋吾之至難者  
俗也難而耐之是吾之於耐且有多於天地其克  
居於此也不已賢於區區空謂耐寒之竹木歟然  
則耐顏其居其自賢歟噫吾固有強而不能耐且  
向不知其所宜耐者在故書以視佩韋而又申之  
以詩曰

束髮事戎馬垂白無成立何以慰重泉 君恩敢云答儒  
夫委時命賤子恥弋獵承平幸無事陰符且搜篋雖握徑  
寸符保障連城邑所責第軍實政令我不執紛紛廟廊賢

恆忌治太急濟時有良牧杞憂空喋喋賤爲貴所凌富或  
將貧隋天殃誰可這況有 朝廷法看劍不須怒保身安  
得俠疾惡徒招尤責善自寡合三人俱我師我心有揮納  
好盡稽生愚阮口時常習盛名實難副文章與德業小小  
未力學虛聲不可劫子路恐有聞其勇自靡及旨哉昌黎  
箴內足外譽集

### 鐵硯歌

硯得之靈邱中界爲二狀如函腹空可以納火觀  
其爲用故是官物而制作古樸非近時器也

羌兒拾得一方鐵製似金騰端半尺三面玲瓏類網設六  
合周遭空一壁古音鏗鏘隨指出古色晶瑩不忍剔三峯



亭亭削寒碧下有雙池瞰深黑中間迤邐一條陌左右方  
田分畛畫一惟黑壤一惟赤作息紛然變今昔初疑此物  
于閩國遺自張華人不識否則洪厓嬾提筆奔向塵寰不  
愛惜細看乃似唐宮掖七寶爐奇寒可辟蒼玉千年功不  
敵五花判出含春澤不知何日盧攜擲偶爾相遭銅劍易  
可憐藩溷供誰役黑白由人黯無色一時珍重登前席似  
起故侯重入直天寒龜手當風裂畫字不成重複急此時  
鐵君真得力脫爾三災自報德嗚呼謫仙金殿承恩波御  
前快酌金叵羅金牋拂拭呼宮娥十枝綵筆脂唇呵簾前  
雪大暖脫靴才名千古無人過彼何人兮我奈何窮邊五  
載提霜戈四時冰雪頭無科喉舌凍結難吟哦篋中鵲眼

枯死多卻從頑鐵凝摩挲六州聚錯鑄此魔幾時得穿拋  
弗磨磨之不穿焚不爛無聊日似嵇康燬眼看炎涼方寸  
幻世上悠悠堪浩歎歎罷長歌笑擲牋髻邊有雪無消年  
鐵君鐵君人生誰得如君堅嗚呼君亦莫恃錚錚堅君不  
見桑公片鐵消雲烟

吳石華孝廉詞稿梓成自粵寄至作此報之因追悼

陳公子棠湖

小蓮么鳳擅才名一卷瑤華萬里情歎我猶爲窮塞主

范希

文詞多道邊鎮之苦歐陽永叔每呼爲窮塞主嗤君也學野狐精

金陵懷古詞三十餘家惟王介甫爲絕唱東坡見之嘆

曰此老乃野狐精也早知哀樂中年集且許樓臺七寶

成腸斷中仙仙去遠瑣窗殘夢怕秋聲

靈邱樂府辭七首

燈官禮

元宵前後三日家各張燈以一人爲燈官司燈  
先數日輿騎呵導遍歷市廛又令數人作男女  
裝沿門歌舞于是各遺以錢供三日之費曰燈  
官禮

六街榜示居民諗正月十日官到任一朝威奪金吾權金  
吾不禁官有禁元宵三夜燈到門門前各自然薪盆家家  
點燈燈要新迎燈爆竹無富貧貧家擎燈作燈役富家但  
作看燈人富家罰鈔貧家打叶違法休言官是假心知此  
官難久居京兆還期五日借且歌且舞且繁華暮夜金來

千萬家可憐金是供蠶食只道年年是官得

游百病

正月十六日婦女相率游城謂之游百病

正月十六耗磨日成州士女傾城出出城日出烏啼寂高  
髻纖腰鬪肌骨女牆缺處湘裙單笑語飛來半空熱君不  
見長安踏歌三日夜墮珥遺簪樂無暇太平是處俗隨時  
不是兵戈從不罷此地城鄰古受降幾回哭倒長城長城  
下鬪髀千粉黛知誰驅死似滎陽游春今日甯傷俗恨不  
朝朝過十六只恐歸來春病多紅樓翠幙嫌拘束

青苗經

邑無水利十日不雨則旱所在有龍神廟苗青

時醵錢資僧誦經穀登乃已曰青苗經也

成州五月青苗生四郊爭誦青苗經不識皇天與后土直

說青苗龍作主願龍付雨雨怕硬硬雨壞苗傷我命每歲夏間

有成州無水烏得龍一泉涓滴龍難容邑有龍泉山撞鐘禱雨處也

擊鼓龍真聾成州無龍虎則雄可惜風從雲不從安得一

朝虎變龍四時甘澤年長豐

### 羊官兒

牧傭之賤稱也

羊官兒官莫識一鞭似節手不釋髯簿相隨任南北南北

紛紛部各別高嶺平原人一壁通侯都尉居何職羊死羊

生山爾役今年少過去年羊楫拙微沾熟胛香不信上林

來召汝布衣草躡去爲郎

白花會

每歲六月上旬賽西嶽九月中旬賽東嶽十日  
間商販畢至遠近趁墟以博爲樂曰白花會白  
花卽博徒之稱其術能令官不得禁予雖革之  
而恐終復也

六月九月東西嶽十日塵頭高出屋婦女停鍼童下學廟  
門踏破聽絲竹廟東廟西高結棚一錐隙地爭連城屠販  
紛來言語變居人似落他鄉縣市門大呼驚倒人千人環  
看梟盧盆女脫簪釵男脫禪豪家儋石無畱存入門但怨  
父兄惡對面不知官長尊吁嗟乎此俗豈惟此地爾禁令

空談牆上紙洞中老翁請勿論洞中二老翁我疑獄亦樗  
樗蒲見異苑

捕神

抱麪人

中元日蒸麪爲人與小兒抱爲樂也

莠麥黃蕎麥黑噉麪不如小麥白七月十五麪作人麪人

笑入小兒羣小兒飢來食卻人明朝再飢食草根

邊俗極儉常以

雜草和糠作粥曰餲餲

生來腹儉悲邊民豐年不過糠覈吞縱使人

人麪是人只愁食卻身無存

送寒衣

邑有哭俗清明中元十月朔三夕婦女各於門  
外向所親邱隴哭之惟十月朔焚五色紙曰送

寒衣家有男子則上塚焚之也

十月朔家家哭紙灰紅紙灰綠紙灰卽得成裳服地上兒孫地下親地上空憂地下貧嚴霜急雪飛不到地下豈有炎涼判冬夏千金裘五色錦裹得兒孫自寒痒沒後能將片紙償莫嫌紙薄情猶長

廣武早發

柴門寒積霧古堞黯朝陽宿客隨烏散征程比雁長千山圍大漠萬樹發清商誰識封侯願窮邊老驢驢

自題山水障子

雁磧龍沙又一年漁村蟹舍碧雲邊何堪白髮還爲客似此青山值幾錢兩岸柴扉栽竹地一湖烟艇采菱天無人



共我江南夢說與鷗情自在然

新蓄一騾名遊嶽

張家騾母真龍匹一年一育修彌赤城西馬叟稱騾師三世絕技人人知我得張騾付馬叟十日騎羸四郊走教成絕電追風迅不數神仙蒯子訓賜名遊岳向平心何須血汗摧堅陣遊岳岳好遊腳爾吾蠟屐吾真樂涉水爾吾鯨穿雲爾吾鶴一聲莫學廬山公猝墮陳搏塵土中天下祇今無一事倦遊還得臥蓮峯

題畫

一繩秋雁過江寒落日僧樓側帽看黃葉聲稀山影瘦白蘋風急釣絲乾便憑榻上書千卷長對亭邊竹萬竿如此

林泉何處少白頭猶自據征鞍

南山有虎行

南山有叟攜童牧叟騎老牛童帶犢忽聞霹靂人牛驚一  
虎當頭來食肉叟離牛背入虎口兩牛敵虎奮雙角虎欲  
格牛叟擲落童擊虎石中虎腳虎逃牛憊叟得甦童孝牛  
忠脫虎虐今朝有樵來告官南山有虎民不安不乞官司  
好弓手怕向山村索牛酒我雖不及裴將軍何人竟作封  
使君大屈長鉞提上馬肯被南山牛笑人

生孫

忠孝家風喜得傳焚香肅拜白雲天隔窗先試啼聲大舉  
室齊開笑口圓顧我已無爲子日浮生祇有作翁年歎餘

漫隨龍鍾泪一硯端能看汝研

粥翁歌

有引

吾年四十四而吾孫生吾性嗜粥因號粥翁命綬  
兒刻一印而自贈以歌

君不見符秦三郎飯一石廉頗老猶斗計食甯腹負人莫  
負腹自古英雄俱穀伯粥翁食粥四十年喉寬腸潔心悠  
然床頭但見鐙腳折座上安知邊腹便虛堂整襟靜默默  
清風入口甌輕旋桃花雲子有無可饑死不堪腥與羶粥  
翁嗜粥粥爲字非長去聲非放翁何義飯不足抑齒不膺肉  
食者聞笑不遑云食粥有三不祥是惟疾病惟年荒否則  
毀瘠居凶喪翁非三者食不當男兒有口食萬羊鳴鐘列

鼎何堂皇鑿刀霏雪羅芬芳手擲犀筋懶不嘗誰堪齏臭  
牙齒黃終年數米憎廚娘波生鼻息泉鳴腸頭頸熟與杯  
低昂翁真鄙人否則狂顧名益覺奇荒唐翁言客已粥爲  
物上應星躔珍列闕蕪蕪奉主見臣忠金谷開筵得賓悅  
一盂富貴尙矜重豈爲尋常凡濁設此是瓊膏白玉屑烟  
火神仙解飢渴是吾沆瀣吾酥醪四時呼吸長生術莫嗤  
寒儉菜根口飽食猶慚太倉竊不聞餓輒乞翳桑亦見凍  
袁偃白雪欲遺道路活千人勝飫朝堂香七日粥翁此志  
空昏朝天公清俸美獨饒王丹橐戲其婦云貧者上帝所  
頒清俸惟世間文士得享之婦  
笑曰有是哉特未  
知何日俸滿耳東翁足穀休相驕安心吸露同秋蛸偶  
傳遞響是天籟縱厭聒耳非吹簫聲名萬古粥翁粥意氣

平生豪士豪有時閉戶動經月破鬲碎雜蒿藜熬平原妻  
孥太邱客啜聲相和參差高羌奴鴟蹲須半燎生來善把  
羅閣調不辭口齟齬底焦顧爾猶賢餅拭刀粥翁粥翁可  
知粥味宜蓬蒿莫望負郭營腴膏只須一粥長盈瓢長盈  
瓢樂陶陶一生粥粥真逍遙粥香更好傳兒曹兒曹雖未  
豐羽毛濟川之鶴可以同翔翔阿翁世外思邈逃姓名并  
欲雙弓殲

恆山懸空寺茂林長老過訪靈邱時磁峽石棧闢成  
索予碑記兼求預誌其塔

半世寒儒半世僧一肩霜雪一枝藤形同老樹千年鶴身  
落懸崖萬丈冰不信蓮花生石匣

欲製一龕  
以待茶毘

真看覺路直

金繩眼前豈少名山客待我碑題最上層

幼海擢守雲中屢邀往晤恐不果諸手書諄諄因次

見貽元韻

畫角聲中髣雪新瓊廬抱剡歲將旬

師古注漢書句歲猶言滿歲

名心

自哂千金帚宦轍誰憐四角輪喜共兒童看隼旟去聲媿承

知己到桐薪衝寒使命相思駕宵似扁舟訪戴人

琴隱園詩集卷十三終

琴隱園詩集

卷十三

五

琴隱園詩集卷十四

武進 湯貽汾 雨生

北塞集

壬午

年四十五起雁門至繁峙蔚州渾源等處

雁門署齋元日

北斗朱旗半壁新東風喜報玉關春時平但食無功祿身健宜安有福貧皇甫不堪詢雁味翁孫恐便老邊塵愁看賀客髭新鑷我自屠蘇後飲人

東坡詩云不妨最後飲屠蘇嚴酒自小者先飲也

王旭莊

天錫見過

佳客喜自來春風滿庭宇相對默無聲但聽瑤琴語

題內子畫芙蓉信天翁

爲畫湖邊舊水雲一生不要並頭分徐寅詩句真消受出

水蓮花是月君

寅妻字月君其贈內詩出水蓮花比性靈

隨處能安飲啄緣菱荷風靜羽翩翩笑予搔首天難問袞袞紅塵四十年

### 雁門春日

春愁漸逐柳陰深幾處鶯啼載酒尋不似江南春可聽卻疑語語帶方音

### 繁峙道中

沙行赤日中飲馬滹沱暑

滹沱發源繁峙秦戲山

怒騎獨橫鞭暗數

五臺五忽見東臺雲飛作西臺雨

### 涉桑乾甚漲



空山松柏徑丈好鳥宿愁低工厭小中庭蓬蒿一尺強客  
至嫌深主恨長桑乾縱闊豈江海見慣細流中故餒請君  
回憶乘長風此直溝渠何足駭

畫水寄千波雲中

雲中最險是桑乾無楫無梁馬渡難不抵溫夷

靈邱塘河  
卽施水又

名溫夷清可弄又憐無處下魚竿

箇儂家住古蓉湖風景由來似畫圖收拾郵筒堪寄與只  
嫌不產季鷹鱸

花閒蠟屐圖爲王徵君作

坐破繩床柰老何從今五岳莫蹉跎勸君勿仿虞家例一  
綳畱穿卅載多

笑我耽遊足趼多，可堪瘦馬逐明駝。  
轉憐髀肉無生處，破盡黃皮短鞵。

蔚州尉徐子容

廣緒

與予相慕而未識，予託爲羅浮

道士易貝水訪之，以詩代刺，向予捕逆入羅浮，曾託此姓名爲羽流云。

眼底千秋口一杯，胸中海岳腳蓬萊。  
祇因要識徐東海，野鶴輕隨塞雁來。

子容屬圖雲海歸鴻疊前韻

烏紗歲月付深杯，仲蔚何須憶草萊。  
共是鴻泥無定迹，不知何處是歸來。

畫倒枝梅花畱別子容

我是羅浮千歲梅化爲羽客戲蓬萊託根只在白雲裏清  
夢期君日日來

子容一見畱飲互酬詩畫座客亦環乞筆迹終日間  
窗測屏窺不知凡幾有爨奴靈邱人私識予密白  
子容太夫人亦正疑之旣行乃亟迹予度不可隱  
因以二絕別之

萬里芒屨一片雲雲烟變幻劇紛紛何須細問眞名姓袖  
裏青蛇記贈君嘗爲子容刻袖裏青蛇一印

雲海高鴻計豈非漢坊村裏君故居舊荆扉幅巾他日登堂

拜莫笑黃冠挂卻歸座客有言某道士者人事雜沓予謂要得清閒除是黃冠挂卻因戲及之

次日子容飯予城南臥佛寺眾客先在

入門三客笑是昨鐵橋仙忽共鐘前飯來尋醉裏禪高吟  
妨客夢縱步了游緣見說黃蓮名山好芒屨不怕穿

同子容臥佛寺題壁

我醉佛貪臥人間醒實難諸天豈不旦深雪亦知寒佛有衾枕  
堂靜樹畱客門閒犬吠官支郎能愛馬換我一蒲團予方鬻馬

子容又白圖雲海歸鴻屬題

欲將黃綬換萊衣況憶江干舊釣磯祇恐雁程千萬里秋  
風呼侶稻粱稀

蔚州畱別子容少府姚益齋興朱竹香履權二茂才

董柯亭友筠進士兼示張水屋道澍刺史水屋先

有和作怪不往見

無酒學佛有學仙仙不能學酒亦難偶然獵酒屐齒折今  
日燕南昨代北鹿衣鶴氅君爲誰達官貴客紛疑猜我豈  
藏頭露尾客高吟大步堂堂來來從海岳雲霄際題壁樗  
皮回老戲回老唯耽十八仙酒名醉餘祇合去飄然多情共  
堅十載約肉芝長大逢君年諸君初見予俱言十年後從游方外年高更有  
張安道心跡相親肝膽照莫嫌對面不相逢蓬萊有徑無  
人通煩君寄語出緣在贈我滄江一釣篷時索寫秋江罷釣圖  
一枝亭芍藥盛開同內小飲

春殘猶掩幕重重今日晴看春意濃南國轉應輸豔麗東  
君特遣慰龍鍾更無公擇堪相餉那有升之偶過從除卻  
卿憐誰共醉惱人時閒度牆蜂

苦雨

十日愁霖靜掩扉  
疏櫺曲檻盡苔衣  
茶烟避澤穿簾入  
梁燕愁飢掠案飛  
老去襟懷空廣廈  
夢中簑笠獨漁磯  
如何尙對長羈馬  
苦嘆浮生髀肉肥

一枝亭雨後

獨立松亭雨未收  
千重寒濕隔雲流  
高飛笑爾雲真懶  
卻放青山自出頭

打麥

琴隱園隙地種大麥輒得二斛

割麥不能打愁霖  
今始休場雞先我  
飽壤鼠藉人周老  
拙慙升斗風塵嘆  
馬牛故園櫻筍過  
新稻漸應收

夜聞溫夷

卽灑水聲

千瀑并長河三更急雨過夢回疑客舫月黑湧江波但臥  
聽泉閣時吟濯足歌吾生亦堪了豈用買山多

看鶴并引

郭西嶽廟有古松巢鶴人莫之識日往東南十五  
里隘門谷取魚哺子忽爲人弋其偶自後獨鶴往  
來彌苦暮卽蜚鳴過我伫於中庭未嘗爽也

不覺月東出中庭待鶴歸也知山郭晚尙近草堂飛愛此  
青松古憐君故侶非多情獨嵇紹相對嘆知希

題幼海契蘭圖

雁門風雪人跡稀忽聞小兒看繡衣城頭凍卒吹角直一  
笑相逢醉難得醉中語我平生心心慳故紙輕華簪書顯

得名五十載，褚虞歐薛源。空尋蘇齋學，書有同癖契。蘭大字題君壁，昭陵玉匣在人間。翰墨緣深自然覲，東西南北齋相隨。梁間秘笈誰能窺，以指畫腹首枕碑。夢飲逸少臨流杯，一朝忽悟枕中訣。虎臥龍跳嫌剽竊，埋卻千枝萬枝筆。生面重開人嘆絕，絕藝從來不朽名。君既不朽視藝輕契蘭，結契非蘭亭與蘭作友同芳馨。繪圖作記千秋情，眾不敢伍長菁菁。憶昔并門乍傾蓋，銜杯香靜羅綺解。羅綺州執蘭解披肝吐鬲結蘭交，忘我形骸是蕭艾。題詩今日記重逢，雁山白草連雲中。援琴爲鼓谷風操，媿我悠悠隨轉蓬。

題王靜山

劭定

碧落翫箴圖



我聞碧落六百卅九字白鶴仙人書絕異當年李監臥碑  
下畫腹椎胸筆難至眼前王生亦筆虎倒薤懸針一齊古  
有時屋壁幻龍蛇妙處遂能驚爾父尊甫幼海善書家雞自好無  
他求刻畫金石思千秋李斯齷齪程邈囚先工虎爪後鶴  
頭二十五丈凌雲樓提筆直上何曾愁當天一畫縱不收  
大笑擲筆雲烟浮十年倒盡金壺汁敗管猶餘筆花溼偶  
逢碧落笑陽冰下筆如何甘不及看君作圖筆陣同精心  
遠過王紹宗勸君適意無求工但能粗記燕然功名姓便  
足流無窮不然磨人歲月是九墨縱使黃河青海盡變黑  
難挽流波向西北

無事

琴隱園小齋題無事爲額客有過而訝者曰天下  
大矣孰能無事況徇微祿詎非空言予曰噫事至  
而有事去卽無風過而竹無聲雁去而潭無影竹  
常靜也潭常清也且有無由我也宓子無之故爲  
大賢高達夫曰邑中靜無事豈不由其身是誠知  
宓子者也東坡云無事此靜坐一日是兩日是無  
於心者也無於心則終日勞勩晏如也朝夕運百  
甕可也若夫庸人自擾雖山林無寢食之暇何必  
在公故靜者之樂能無事而已

彈琴了無事

高適句

心似白雲閒變滅縱無定去留殊不關

愛花常抱甕覓句亦登山碌碌原非暇塵機一笑刪

曉憇渾源山中古廟

健若霜鵬凍不僵穿雲驚起曙鴉狂孤僧汲水方供佛野  
老開門正賣漿雪壓黃精迷古路風生白額上空堂停鞭  
忽念鄉園侶斗帳梅花夢未央

阿烏歌

烏嘗爲道士以二千錢鬻於  
叔父爲奴叔父卒乃事吾

我有短童粗識字自言生小爲道士吹笙擊磬誦黃庭飽  
飯安眠無一事阿翁亦是舊黃冠萬里追隨豈無緣抱琴  
洗硯不爲苦不比獠奴事杜甫桑乾水深勾注高有時騎  
馬意氣豪如鳥出樊羊脫牢閱歷已覺輕兒曹我非王仲  
翁不用傳呼出入爲儀容眼前貧似玉川子汝到鬚長恐  
餓死便能東西南北隨我二十年終須負汝七百廿萬芒

鞋錢老子西度關僕徐甲源約日直百錢自云隨老莫學

長生空自苦但能辟汝眞賢主

憶酥醪洞江道士

灑藥梅邊古洞春客來懶著鹿皮巾床頭綠蟻先嘗我袖

裏青蛇不見人石鼎吟遲新雨夜玉杵敲暖落花辰回頭

便比蓬壺遠漫問韋郎隔幾塵丁約謂韋子威郎君得道尙隔幾塵

玉女峯前手一分龍髯塵冷不逢君閒騎仙蝶出紅雨饑

嚼玉梅和白雲別後三彭成逐客閒來八素當奇文有時

縮地終相見祇恐昇天喚不聞

懷白雲山鄭安期得仙處予屢從探梅

絕塞如何夢去頻梅花一別竟無春十年只有焦琴識箇

是安期眼裏人

懷人詩七首

太倉力士張立松

字孟如短而髯善技擊阮芸臺先生撫浙時客  
嘗從李總統擊蔡牽旣平聞南海盜張保烏石  
二等未滅投曾賓谷方伯比至適降困于逆旅  
與予過從飲無醉期醉則爲予舞刀又善畫松  
襖被天南壯士飢樓船十萬見君奇誰如猿臂黃熊掌能  
敵顏弓朱亥椎筆底蛟龍松十丈胸中塊磊酒千巵市樓  
歌哭無人問一劍如飛去幾時

湘江漁父無名氏

余浮湘見一老漁與一女收網飄然不俗就買  
魚曰無試叩其姓名曰漁亦何名之有卽歌而  
去呼之如不聞矣

杜蘭香畔醉醒時答我無魚但有詩

岳州志卓彥恭嘗月下問一漁有魚否應

曰無魚有詩卽高吟云云

自古瀟湘無俗客至今簑笠費相思形隨白

鷺臨風瘦家在蘆花只月知悔不相從烟水沒別來崔鉉

髻成絲

崔鉉守江陵時有漁不言姓氏崔就問之

渾源罪人胡梅

字赤簫上海人禍由文字三遇赦乃歸苦吟數  
遊北岳詩大進予序其稿渾源人多從遊焉

忽得詩因結墨緣南冠幾度對淒然一投雁塞頭先白三

見雞竿命始全我獨憐才人欲殺生雖不遇死終傳元都  
多少游仙客絕壁猶驚筆似椽

羊城賈黃喬松

字蒼霞好客樂施負債數萬走匿他縣工吟嘗  
築雲泉山館于白雲山種梅數十樹余屢游焉  
痛飲狂歌市隱身可憐劉毅竟奇貧傾家不爲千場博亡  
命猶交四海人自買青山尋客住要留白鶴與梅鄰早應  
不羨鴟夷富一臥雲泉已十春

三江老兵王林

工莢花尤善接果木濱江居人多業種果出其  
手者卽成絕技也予守三江時已貧老欲死今

又十餘年恐廣陵散寂然矣

殺人身手惜花情萬古誰傳種樹名子厚久應成小傳王  
尼媿使作牙兵饑來眼飽干林實老去心酸萬葉聲孤蝶  
窺簾如有意幾回疑汝化來輕

姑蘇逆旅主人王三娘

嫠而貞供具精潔視人惟恐不周清談娓娓妙  
能解紛每論代謝興衰動人感慨如春夢婆也

巷比烏衣客易尋畫堂生小燕知音莫疑秀實因緣女

陶穀

贈驛卒女詞好因緣惡因緣云云

最得林宗洒掃心白髮蹉跎花富貴紅

樓閣歷絮光陰等閒廣廈男兒志娃館春殘草自深

日本國中士古後七郎右衛門

染川伊兵衛



稅所長左衙門

三人皆薩摩州中士而官海島在番海島在番者司島民租稅出入者也國有六十八州薩摩其西南九州之一也乙亥八月同以任滿還薩摩颶風吹至碣石同舟四十七人言語不通幸三人能文具書所以有司以聞乃送歸其國丙子正月予伴暹羅使臣南返遇諸庾嶺賓館中筆談甚得懷袖間各攜紙筆絕精古後七郎草書在顏米之間予以紙素乞之卽書日暮鄉關何處是烟波江上使人愁太息竝下如不勝情又觀所攜刀三十三口其俗中士以上得佩大

小二刀欲買之不能瀕別皆乞予詩而稅所長  
謂其父年八十八能詩欲歸以爲壽云

烟波日暮涕潛潛  
船越風回去莫攀  
折柳空憐歸海客  
扶桑不信在人寰  
腰間玉具蛟龍敵  
袖裏霜毫性命關  
珍重徐疑舊詩句  
唐徐疑有送日本使還詩  
白頭應喜見生還

塞上無竹偶致盆篠聊免俗耳作歌贈之

我抱幽琴大海東  
長風大波心眼曠  
我抱幽琴深閣裏  
蒼綠燈紅意閒止  
偶然境異琴何分  
默參靜會忘琴人  
研北屏南一盈竹  
撮土杯泉培靜綠  
我意何曾辨伸屈  
竹心豈必嫌拘束  
滿湘眼界渭川胸  
斂取臺釐石便足  
卅年游宦窮西東  
盡爲人栽花竹叢  
於今行到無栽處  
直遣王猷不

能住數竿從此勿相離與我琴書到處攜知君此地非得已除卻清風孰知己

夜聞逐狼

前朝狼殺城東兒今朝狼殺城西女城南城北晝閉戶城外城中戒行旅三更忽聞喧四鄰大呼白狼來闖門一呼百和不見入各匿矮屋奔雞豚耳後生風鼻出火射虎南山十年我調弓矯箭蕪札明夜半開門不嫌裸君不見王荊州獵師日對青山愁

王業爲荊州刺史惠風大行山無豺狼

題蕭尺木山水

并引

故廣靈令杜某家物某子孫占籍廣靈竹航宰其邑偶以己畫易得而弗善也以貽予紙本浮薄又

莫或珍護幸而爲拭案覆瓿所遺耳昔漁洋題所  
畫楚詞比之顧陸僧繇裴裳題其杜陵詩意圖謂  
風格遠過文氏而太白樓畫壁幾與安樂寺大同  
殿共爭千古筆法渴而自潤簡而彌至又拙澀處  
轉似不習乎此者而其長乃愈不可及是安可與  
外人道也

爲誰寫照樂逍遙瀑側林邊杖一條漫把滄洲評顧陸吾  
齋從此欲名蕭

幸離寒具亦由天蠹篋苔牆二百年有幾詩人是知己平  
生只贈李青蓮

珍重還貽協律詩

香山有贈協律  
郎蕭悅畫竹詩

可憐同調不同時後來

我亦蒼翁耳玉軸金匱自覺癡

欽贈蒼翁杜令祖也

與內子合寫菊花雁來紅小幀

一點青霜著幾鴉不勝消瘦惜年華  
羅含宅裏無人見自畫幽窗帝女花

白衣人至爾先酣一樣秋風我不堪  
此地逢君方雁去教人那不憶江南

自題逍遙巾雜劇

遊戲能工便是仙相逢苦問去來緣  
班龍輸卻騎茅狗我自羞還舊洞天

何處青山不愛君勸君莫問葛仙墳

在羅浮

烟霞本是詩人

物豈用神仙手裏分

介幘何須笑竹皮蘿襟蕙帶雅相宜若非菊畔因風落料  
汝從無着地時

望斷天山雪裏春幾時重得話鱸尊睡壺擊缺誰相問盡  
是吹簫聽角人

紀夢

并記

壬午八月廿一夜夢登一小亭南有峻嶺萬松屏  
列險極無徑西數武有洞深邃側身探之光明夷  
坦第跂跂蠕蠕壁多毒蟲卽止不入忽見一僧持  
鉢方飯所憇非廬非龕似穴土而處謂予曰此遲  
歸洞也此處在昔曰法性寺最初屋比丘尼自雍  
正二年始廢予觀其東紅牆碧瓦自別有一刹巋

然於松聲雲影間隔一箇倦不復往因返亭涉澗  
登舟而行水急舟馳雲巒萬重一瞬而逝抵一城  
府遽然寤喟然曰異哉夢也偶遇少年與談所夢  
少年曰天下恐果有其境曷不記之予乃援筆而  
記思欲吟一詩而侍婢嚙語驚人舉帷視之殘月  
在窗則說夢紀夢依然夢也默憶記夢一篇忘者  
數語晨起記所記如是窗旭瞳瞳上雲下地此時  
此際夢耶醒也

遲歸洞天法性寺無何有鄉我何至夢中說夢慙太息筆  
札猶存大槐國平生好遊足繭重黃沙白草路亦窮青天  
飛落千芙蓉置我屐底開心胸此意可感天憐儂胡爲忽

棹滄江篷犯險又復乘長風因馬夢車車夢蓋夢以因成  
何足怪十年不忘水雲邊一夜方離沙漠外夢中說醒醒  
疑夢醒夢何曾分伯仲數行聊當紀遊篇莫將芻狗諮周  
宣

詩集篇爲子容作

冰埋雪壓三間廨春到門前塞蓬艾此中云是詩人家風

雨千秋窮不壞詩集大字似銘陋呼壘呼壇實爲最已同

仁裕分高卑

高仁裕著詩  
萬篇號詩密

還與渭南共寬隘

放翁名其眼  
居日書集

中知己朝昏隨海內騷人生死在可憐同調我無幾年少

凋零況先輩因君不盡山陽悲詩在詩龕

法時帆  
齋名

詩世界

隨園  
齋名

生同飛雁本無巢爪跡空畱南北塞君是鸞鳳合珠



樹偶爾卑棲自無賴一身錦繡燦文章俗眼徒驚毛羽怪  
詩來徵我詩巢詩恨不相逢雙翼快羨君此巢風雅會狐  
穴紛紛真濁穢我詩寒類紇干雀啾唧君應棄巢外納納  
乾坤不朽誰多君故紙能珍愛

距城三里曰石人臺有古墓暴露邑人劉執中告予  
掩之作此誌感

靈邱城東有荒原石少沙稀厥土赤遠近多年資版築上  
成壑谷下絕壁壁中有穴袒兩棺年代無稽子姓寂牧樵  
探手窮鱗施白骨黃腸顛倒擲生居華屋厭閑閤死卜佳  
城固磐石滄桑陵谷豈所料行路紛紛空歎息此地沙場  
多戰骨馬鬣何人安永宅風生焰赫尙遭殘誰保千年塚

草碧一抔今日爲爾掩巖腹緣同王果昔君不見比歲年  
荒復大疫溝壑填人若山積杜陵廣廈竟空談生不能恩  
死何益

鵩鷃止圃樹兒子祐名射殪之因示以詩

禽而獸形眾惡女雙目睢盱爪如虎嶺南習見童稚識白  
日中庭意莫測聖人在上丹鳳翔而類乃敢行堂堂殃  
人未必先自斃我雖惡殺汝不貴兒曹亦讀韓公詩快意  
一發正墮地墮地翻思疾惡嚴旣容造物吾何嫌不聞鵩  
侯愛鵩把酒聽率更聞梟承寵命人生禍福由自求天尙  
可勝夫何尤

距武靈王墓南二百步有二塚焉爲乾隆間都尉邵

陽王興朝封君與都尉夫人葬處蓋歿時興朝方  
將兵楚南旋以功擢關中參將卒邑民楊獻臺上  
舍劉澍以付託故爲歲時祭掃今澍死而楊亦衰  
老余慮歲久莫知其處其子孫將抱痛于無窮也  
因立二碣于墓誌以詩使人知此土有重諾之士  
云

塞沙亂石無人迹雪壓荒墳白楊直一身許國王將軍萬  
里親魂歸未得親亡親葬子不知可憐賢婦相追隨卅年  
野祭兩義士楊叟獻臺劉子澍獻臺益老澍今死誰識將  
軍孫與子短碑三尺字無多我爲杜羔聊記此頻年骨肉  
痛摧亡仲父京華弟瘴鄉夢隨丹旄逐流水未卜馬鬣營

何方龍岡況復生荆棘趙隱何曾守松柏傷心不暇爲他  
人白蝶紛紛又寒食

讀柳州詩集

將相功勳一樣成美哉皇武又方城韓碑不是文章好奚  
止元和卒不平

一時雅頌繼周商大筆兼推詩史長不有饒歌賡十二誰  
知李靖滅高昌

誰共劉郎晚歲遊可堪詩思柳城樓三聲爲下聽猿泪千

古交情一播州

公衡陽與夢得分路凡三贈詩有晚歲結鄰之語又有柳州城樓寄漳汀封連四州

詩連卽劉也

何限飄零瘴癘身偶因展卷淚盈巾夜來一夢牂牁遠不

見羅池拜像人

峻欽于去冬卒于羅城主簿之任

悼姚益齋茂才

太倉人識于子容齋中逍遙巾雜劇中有之予曲成而君死未之見也

老去宮商不挂口一朝風雨疾出手槌床拍案不自知筆

頭尙帶蔚州酒打包十日小出家俗人見異知己嗟天遣

姚生不先死花前必識掃雲子黃泉太近羅浮長曲終不

見摧肝腸

益齋約十年後從予羅浮出家

朱茗山

增

見題逍遙巾傳奇以予今春遊蔚未獲識

面爲恨次韻答之

久矣朱門厭曳裾臨邛今尙客相如一春不倦登山屐百里偏遲問字車羅雀我原荒逕冷搏沙君亦故人疎肯因顧曲來過否美飲猶能解佩魚

罷琴

罷琴憶遠人寒抱梅花寢華顏似圓月一夜一分減手中  
金粟尺眼裏團團錦爲我薦朱絃至今承泪點

病

不藥卽無病知醫必誤人合將詩送老兼以醉爲春冉冉  
百年夢悠悠萬里身少愁還足睡寒餓亦精神

寄大司寇韓公余向在嶺南隸公麾下

元和尙書舊知己千里書來看墮淚上言詩好名終傳下  
惜官卑時未至雕蟲豈是男兒爲身閒手懶無聊思偶然  
識字勝雷勝昔日未累公撚髭縛雞之力射虎氣賤子數  
奇老不利英雄貧賤容顏低一旦屈膝刀筆吏不才何足

玷薦賢看人盡脫鮎魚竿清高何與左雄事德行豈是無  
知言滹沱十月冰匣岸馬蹄割血臂凍斷不如石罌禪堂  
弓到底射得半个漢感公延譽愧轅軻見公不許成悲歌  
非公難語大段事且欲耽吟從此逝

馮魚山

敏昌

比部嘗摹趙子固落水蘭亭幼海又從

而摹之頃自雲中寄觀題後

君不見唐天子右軍真跡三千六百紙就中最寶襖帖是

二十八行三百字普徹摹之八人賜

廣川書跋貞觀中詔令湯普徹搨蘭亭賜

梁公褚遂良歐詢

馮承韓道趙模

諸葛

貞宋人避廟諱作正規撫雖工

各殊致自從玉匣歸昭陵優孟誰能別同異可憐定武跡  
肥瘦俱唐賢是非真面尙廬阜不似後來怪石充于闐或

憑五字驗後先有流湍帶右天子昂到老不過見三帖

子俊蠹蝕字不連完者崇文敝孟堅文休承書畫目錄子昂跋譚崇文五字不

損本云予生六十有四又南北往來行幾萬里僅見兩三

本一在叔固丞相宅即族兄子固所藏一在家弟房近自

吳興攜來都下見與一在譚崇文許三本皆無小異余所

得苦為蠹所損叔固者因水滄廩遺字畫小皆惟譚公所

藏紙墨完整神明煥然當為三本之甲云子俊迄今又歷

公弟孟顥字此帖亦有跋蓋在跋譚本之前

六百年非有天神呵護虔此物那至魚山前我讀孟堅記

性命不如紙卅年書上不停趾難似貧兒博朱紫出蕭入

俞又高氏半萬金錢沽偶爾歸舟覆溺命垂死手格蛟龍

奪還此子固記云蘭亭刻稱定武為古今絕冠尤以五字

來歷源流可證予不必贅特予於此刻頗有前緣得之殊

不易始丁亥歲訪雙槐鄭君因指蹤識蕭君介父首見此

刻知為奇寶惟沈虞卿貳卿夏小山王亞夫本同此三十

年前初識也後於俞王鑑家雖見數本終不若此為的當



於予心方其在蕭氏二十年間每聚會必展玩豈意出蕭  
而入俞及俞氏既得又安意其他屬丁巳年爲滿師以古  
鏡刻漏及他玩取之玉鑑予所不知也戊午春經過無錫  
賈小宋言高幹辨者得此因往訪之果然驚異壽翁何輕  
此而與滿有欲爲吾道地貿易於高搖手不許盤礴五日  
不得其門而歸每恨然失於蕭又失於俞也已未春見滿  
師欲屬其求之滿言非半萬券不可予亦忍痛有破費而  
定盟秋中滿以書來言可得因攜此數以躬聘粵兩月盤  
旋雲上乃得入手喜甚季秋廿五日揚風帆自雪城東關  
言歸道昇山風逼帆覆舟幾殞命由此刻也造化見護  
存一綫生意不死而此寶亦略渰溼起之溪流中其他行  
李盡不顧披溼泥滿卽投小寺烘焙不損壞記造物之惡  
劇也如是是嫉予得此寶耶戒予浪遊遂末不顧家事耶  
不輕付工匠且從粘茸聊記云爾首尾三十三年心好目  
玩終獲爲我物幾死猶不恨也人其可以此後紛紛易主  
輕視予有此哉此帖見者蓋少故備錄之  
頻巧偷豪奪究有幾輩傳兒孫遠者且弗問但看退谷少  
宰承 同江村高薦事天瓶張司故是看帖人朝露一歎令  
澤 我涕淚沾衣巾江村先生記云落水蘭亭孫北海少宰硯  
山齋中珍藏第一罷仕二十餘年自謂足

以怡老比歲輦下士大夫搜求少宰所藏賢子不肯輕出  
示人予再入都始重價購之又得天先生跋云康熙壬辰  
癸巳間予從江村先生生長孫廟山借觀畱几硯側數月已  
而儼齋司農向其家索取之後二年予偶過司農齋值羅  
列名迹與岷瞻何丈對初陳君縱觀因得重觀忽忽二十  
餘年爲雍正十三年乙卯蔣侍讀質甫出家藏名迹付予  
鑒定此卷在焉始知久歸相公書畫舫也回憶司農座間  
看帖人惟予在矣有情如朝露賴無情者以永之情與無  
情同一體豈第千里一室千年一會直是卷中不知魚山  
之人共成一佛耳更千百年誰又入此古鏡者又不知魚山  
又向阿誰手借觀乃得傳摹真幼海癖書本家法金丹自  
得骨與筋桃源未至見漁父此中天地聽說歷歷如身親  
幼海自印泥畫沙具真旨典型尙在豈與美叔疇齋瞋山  
記語集云晁美叔嘗背議予書惟有韻耳至于右軍波戈點畫  
一筆無也書畫日錄張仲壽題定武帖云皇元以書名當  
世者予昂一人而已僕近見彼莫羨魚山似毛壽漢宮美  
臨蘭亭大不滿人意張字疇齋

人親笑顰君之聲名亦無敵有如凌烟褒鄂再見曹霸傳

精神邊城十月硯冰白一匳遠寄山陰春醉人得似釭面  
酒但覺古味芳馥胸襟溫我思鼃追失千里自分婢學慚  
終身題名紙尾珠還君他年此又連城珍孰知千緡與萬  
緡願祝千秋萬歲不墮水阨火劫世與書聖爲緣因

大雲寺逢五臺僧向識之蔚州

遊春最憶城南寺結伴同呈臥佛詩下馬先尋不住子烹  
泉共話可中時禪家謂已時日可中時似嫌肅客袈裟破自說貪眠  
鐘磬遲忽隔千山逢柳栗無人知是舊相知

偶成

氊帷掩雪地爐丹稚女難禁障指寒最易懷人逢歲暮不  
堪哭弟到宵殘愁時酒每銜杯醒靜裏書頻閉眼看多病

今年懶提筆  
冠羸豈爲嘔心肝

琴隱園詩集卷十四終

琴隱園詩集卷十五

武進 湯貽汾 雨生

北塞集

癸未

年四十六起靈邱至平刑大同代州再至大同止

仲夏同人遊鄧峯寺經宿回城分得如字

相傳有鄧雲峯兄妹

者修真於此得名

萬綠投筇竹名藍盡不如到來忘絕塞誰可讀仙書一夢浮雲外三杯太古初長松猶可戀歸路倒騎驢

鄧峯之遊偕徐廣文並邑中數人兒子祿名越箭頭嶺而南復行深澗中四十五里極險峻寺又在一山極深處不能騎歸遠玉皇嶺雖稍寬平而予以

跋涉冒暑病甚然不悔也

成州諸山北連恆太白以外無名聲鄧峯古寺萬山裏鄧  
非峯名峯人名一宵風雨忘炎夏策馬高岑汗流赭寺門  
落日人馬疲覓榻謀餐遊不暇山僧愁虎虎愁飢虎徙僧  
行空翠微一樵贈薪指汲水驢背幸有遊糧齋南山萬松  
北山柏下有千尋古澗黑樵言此地有真仙兄妹名同李  
八百李八百妹稱明香真人筇休屐脫心魂高夢入青松古鶴巢回  
頭獨立玉皇嶺便憶樵人似仙迴諸君豈必再來遊況吾  
足跡亦何求得不償勞東野句昨朝幾把山靈尤東坡讀孟東野  
詩云所得不償勞歸來臥病家人笑且喜詩囊堪一倒覺山尙欠  
馬蹏緣吾方踏遍成州山

明山東左布政王熙寰

振祚

先生幅巾歸棹圖遺照

爲干波徵君題

公萬歷進士初宦大理寺丞治獄多平反有當事授意旨欲出入人

罪公正色曰問官知守法耳餘何知官布政時大僚爲魏璫建生祠迫公列名乃引疾歸究心理學

著有六經注疏  
濂洛宗旨等書

仁獸猶爲厥臣至俎豆行將配孔子生祠豈足媚老閹汝

楨之徒枉無恥山東方伯何剛方不聞彪狗誅忠良嵩呼

袍笏盈祠堂幅巾公乃登歸航二百年來見遺像聞公軼

事多奇讜活人自執法司法講學焉知黨人黨至今猶見

雲仍賢家學惟將守正傳魏尙勳名已如此

謂切海太守

徵君

試爲蒼生起公若生今不歸矣

時干波方謀歸

修竹吾廬圖爲干波題

奉隱園詩集

卷十五

二

少華門前烟景奇十年秋夢恨歸遲  
獨愁青土相思苦好把平安寄與知

白草城邊溪逸來商量無計替人栽  
隨身卻有王猷宅不用肩輿蹴碧苔

因君相憶到焦桐萬綠江亭畫不同

余三江官舍手種竹木最多

別後

琴樽無恙在可憐嵇阮各西東

筍鞋已自踏塵腥幾向梅邊見爾青  
但得一竿歸計準漁磯安穩落蜻蜓

子容囑寫韓山歸讀圖就題

有幾江南客貪吟塞北秋官貧親況老君去我難留何處  
山容買生涯且釣舟書聲尋得到還爲作羊求



十月四日同人過集署齋消寒分韻兼柬黎蓮鄉

中

輔明府郝東旭

昇榮

廣文

難得風流八酒仙麓官許結墨因緣

會者九人

久無客共三三

逕且喜寒消九九天歲月忽驚烏帽雪畫圖長積雁門烟

同人乞予補圖

肯停趨府投車轄各啟詩城地主筵

紺園晚霽爲方丹衢茂才作

丹衢嘗夢遊一園有樓顏此四字集同人作詩且乞余圖之蓋消寒第二會也

黃雲壓城白日黑萬里龍沙斷行跡風流方澤題樓人獨立天山聽羌笛羌笛悠悠吹斷魂隨風不到江南村參差金碧忽照眼似悟初地投緣因徘徊花下蒲牢晚紅雨一

肩流水遠樓臺如此絕遊人雙燕斜陽春不管平生少把  
茅蓋頭本來無心依寶洲偶逢金界腳不住百尺自臥元  
龍樓天寒日暮黃蒿裏相對一尊娛日耳聽談幻境空茫  
茫處世大夢誰非子雪鴻難覓亡何鄉此中有誰堪咏觴  
曷如我夢但芻狗不負癡腹登君堂周宣對魏文帝夢  
芻狗當得美食登  
君堂配君酒華胥之樂醉鄉有但能長醉不復醒魯陽何  
用羲光停勸君且莫憂顏齡亦莫窮邊動鄉思呵毫爲畫  
龍眠青

雲中懷古同消寒諸子作

攄毫幾欲賦張嵩極目龍堆萬里風鹿苑鸞輿秋草白鳳  
臺金粉夕陽紅千秋莫識平城計七郡爭傳飛將功遊俠

少年差碌碌清時無用是英雄

月明誰唱大刀環羈客相逢破醉顏盡向三邊成地主不堪雙髻老天山無憂坡上笳聲冷得勝關前雁陣寒試把邊愁付詩句平生最笑筆投班

王虛舟真草千文從幼海太守借觀題後

智過其師名得隨瑯琊論書多妙諦初臨貴似久必遺取易舍難舍乃至

皆虛舟論書  
贗語中語

公書本是唐賢來較詢多肉

柳多姿金壺倒汁遍海內偶覩此卷師永師楷則飄揚草

嚴重

東坡云真書難于飄揚草書難于嚴重此卷兩得之

二千餘字真龍鳳萬金誰

餉蕭東陽一笑明珠翻暗送奇緣幸復歸知音親題紙背

亦快心紹宗結習放在此此物況喜同家禽

此卷本贈某帥後歸幼海

從祖某而幼海又得之燕市賤子書誠田舍漢提筆不能書馬券敢向  
長綃記姓名瓣香空有平生願願君壽石陽城同公書在山右者  
有陽城三賢祠碑亦似賸語同人公論書賸語不然就觀不輕借  
將如船帖盧家風幼海所梓

題幼海讀書松桂林園

讀書松桂林寄興塵鞅外林風與泉韻悠然出天籟幽禽  
亦嚶嚶適與書聲會世人行作吏何事不盡廢牙籤卽滿  
架似與手相戒先生澹宕人天械無拘礙只知性邱壑不  
覺身軒蓋心恬自官暇民樂方時泰及今雅化周絃誦流  
邊塞人猶單父逸業更文翁大同思山水縣重展雲烟畫  
鬚眉染岳色幼海來守雲中今昔殊容態還向雪窗深叩

晤共兒輩我今喜連牆往來趁衙退借書日相擾自厭書  
城隘君有五車奇我無十行快行復辭君去書巢幾時對  
題詩兼惜別一語休嘲怪識字憂患生讀書精力憊有口  
吸長鯨此樂尤稱最

干波輞川問津圖

得得芒鞋烟水青輞川圖畫自天成幾分借月支風地一  
種眠雲聽瀑情詞客有靈宜汝到青山無恙笑誰爭十年  
雁塞吾何事亦欲藍田射虎行

甲申

年四十七起大同還靈邱至  
應州再至大同還靈邱止

正月廿九日雪後干波招遊城南諸刹餞予華嚴寺

中予將代還靈邱卽以畱別兼訂北岳之游

一東飛來說柳泉今朝爲我了游緣看山便策城南騎乘  
興何殊雪後船畫角層樓新別思夕陽古寺舊吟篇壁有千波  
題還期刺取陽關酒同醉春風大茂顛

寄懷子容卽再題其韓山歸讀雲海歸鴻二圖

少尉風流絕代奇景山中酒偉長詩若除書酒誰爲伴爲  
夢韓山髣有絲陽羨買田猶我望陰符刺股獨君知春風  
一樣悲楊柳不信英雄會守雌

醉鄉邂逅醉鄉離那復塵市換穀皮

予幼訪子容時託爲黃冠留飲盡醉以逍

遙巾野鶴不成松月夢歸頭可有稻梁資人中騏驥修仁  
業天上麒麟士秀兒只恐程非易息略畱辛苦雪泥知

五月廿五日琴隱園作

北窗濃綠如深谷把卷當風吟  
新浴披襟散髮聽蟬琴此  
是閒官舊清福七年漠北無華  
風年年六月衣裘重我非  
延陵負薪者誰是桐江垂釣  
公桃笙滑澤精神屬竹露荷  
風有餘馥知音難覓法曹貽  
巨物翻憎孝伯俗今朝節物  
同霜天伯勞不鳴楊柳乾持  
苦獨念碧筍客此時瓜戰珠  
江舡炎涼境異甯相憶長對  
市山萬古雪霜髮猶餘幾日  
青中腸久異旁人熱閒揮松  
壁話兒曹知足隨緣樂自饒  
襤襪千人知幾輩騎驢揮汗  
軟紅高

### 九日登北城寺樓

萬木西風獨倚樓粵峯回首似瀛洲

羊城粵秀山余九日每偕客燕游

前誰是龍山客老去空悲雁塞秋酒盡茱萸成往事茶消

桑芒了清遊少卿久減笙歌興側帽斜陽一醉謳

暮秋偕友飲郭西王處士家畱贈

梧樾搖落短垣風幾度尋秋繫玉驄白髮休官餘我在黃

花對酒復君同

己卯秋偕李廣文趙少府訪菊至此二子俱已罷去

舊題詩句兒孫

熟新結實朋飲饌豐不是習池偏愛過十年無事到山公

靜掩柴關六十年不求丹藥不逃禪妻儲美釀兒工獵夜

讀奇書畫力田肅客無妨捫蝨褐買花安用遶床錢終南

多少蒲輪轍眞隱誰知孺仲賢

暮秋偕友魯少府齋醉菊

獄空秋稔吏如仙松下吟殘對鶴眠莫厭雀羅賓從少座

中佳客傳延年



秋到羅含宅裏先雙罌愁壓小童肩可憐趙軌清如水一

勺思留漑菊泉

尉署無井前官趙東山治圃擬鑿未果

題糕時節醉相宜各向風前整接離清宴幾番遲屬草端

愁奉古說偷詩

魏奉古尉雍邱九日公宴有客草序五百言奉古曰此舊文也援筆倒疏之草序者

默默自失列座撫掌奉古徐曰適覺記之非舊文也時同人屢約賦詩未成故云

無妨秋夢老黃綢燭跋霜寒倦卒騶一醉儘從觴政虐酒

人狂不畏魚頭

幾能留得好秋長細撚秋英茗椀香

時採菊點茶

更約重來烹

射鴨補酬醉墨兩三行

懷無垢上人

主廬山報國寺

白鶴青天破暝烟名藍正訪翠微巔逢師帶杖松門揖送

客隨鐙竹閣眠此境夢來如隔世有人歸去可稱仙

方茶山廉

訪守九江時于寺旁置草堂今茶山解組矣

君廬我愛誰能割

嘗囑題額予為書愛廬二字

履印空期五嶽全

自覽塞上集感題

雪角霜戈老戍邊清時事業寄吟篇乾坤有我原關福寵

辱由人枉論天不借功名傳著作暫憑詩酒當林泉買山

僥倖羞种放食祿無功又賜錢

重覽羊城諸友雲泉餞別詩別久無耗感賦

塵問方外總詩仙

同餞者有釋一

舞鶴歌鶯記別筵白草

黃沙人萬里綠蕉丹荔夢三年病回似醒中山酒

余在粵病略血

出塞方愈蓋三年矣宦拙猶遲上水船只有梅花還念我題詩能到

詩入臯橋  
今雨集

君家吳苑偈吾里生死不見因貧官貧官漠北

知己盡僅有姑射音書傳

桂客絳州

書來自道東山孫自惜擔

簦同邠原春風寂寞絳帷敝曳裾始作侯王賓昨歲青門

入幕府支風借月開廊軒門逕逶迤花側塞左梧右竹青

山鄰橫經宛似虎皮側孽窠榜額無差分如燕重栖隔年

壘如鴻再踏前泥痕今生不至西州門一旦至此劇愴神

繪圖作記惟緣因徵詩爰及師同人

黃視北先題亦鐵雲友也

一瞋天

涯又陳迹竹梧蕭瑟誰還親種梧拂拭待棲鳳種竹守護

期干雲但中樂具用已小師意豈慨知音淪我從守邊今

八載愁笳怨笛消昏晨馬通臙目羈坐痺瓊廬壓迮塵沙

昏初常鬱鬱今申申靜學廡閉忘秋春卅年所至費畚揭

浣花載酒徒紛紛乾坤逆旅總蝸寄但有四壁堪藏身秦  
宮梁廡無富貧不成榛芳皆灰塵有誰華屋長生存君悲  
梁木人憐君君不見官奴城畔戎戎屋虞公喜故宅迷樵  
牧句餘之山無草木或待君還種松菊有日扁舟來信宿

聽說安昌舊絲竹

佳慈  
翁人

乙酉

年四十八起靈邱至大同繫峙代州再至大同太  
止原入紫荆關抵都至保定還邱三至大同還靈邱

題丙子元嶽採芝圖

翠壓雙肩花滿身逍遙獨學魏夫人龍仙鳳腦皆芝名尋常  
物且踏蓬萊頂上春

瓊田鴉嘴破雲濃石逕風多霧鬢鬆好爲名山留勝跡千

秋響屨玉華峯

古洞雲香翠雪晴

舊有翠雪亭

裙邊朱草露千莖昌容自愛新

來客羞把蓬蘽盡主情

列仙傳謂昌容常山道人食蓬蘽根二百餘年女仙傳則昌安女子也

卅年五嶽共遊殘人羨霓裳侶竹冠我愧葛翁卿勝絕鍊詩精似鍊還丹

彷彿蘭香萼綠姿手拈三秀似珊瑚枝

神農草木經五芝赤者如珊瑚

相攜

不見鍾陵侶齒髮因慚蕭靜之

蕭食肉芝齒髮再生見神仙傳

春到通元谷口長遊仙賦就壁琳瑯斷無人處歸來晚裙

帶風迴山翠香

泉石夫妻骨相親雲中仙佩鳳凰迎祇愁彳亍凌雲去蘿

月松風太上情

食肉何曾到細君  
貧餐空笑屢屢焚  
幾人中饋如卿雅  
采得仙芝共增分

侍女也應餐絳雪  
仙郎自合搗元霜  
而今正識雞蘇味  
何用頻抄肘後方

東坡夢食石芝味如雞蘇

人壽何關芝朮延  
愛遊卽是地行仙  
畱將一卷遊仙紀  
勝

續黃金綠玉篇

皆仙經篇名

猿鶴相隨苦其饑  
故山菰韭向誰肥  
張揆已爲防邊老  
那

得憑詩乞壻歸

唐將張揆防邊近十年妻侯氏詣闕獻詩求放揆還鄉

歸去春邊煮粥糜  
白龍元鶴渺難騎  
鹿車辛苦牛衣冷  
羸

得今生少別離

代州道中

兩三茅屋不成村，布穀聲喧氣候溫。  
驢背紅裙郎挈鋤，邊白髮婦攜樽。  
荒原散犢猶眠草，野寺愁猿已閉門。  
四面青山徐榻在，舊分襟處最銷魂。

嘗別尚都尉安于此

三月望日雁門馬上

雁門高碧雲，合烏啼古垣。  
狼走堞三月，冰堅馬行急。  
馬踏堅冰如石平，平生塊磊已慣經。  
雁門冰自古時有我跡，畱冰今日偶四方。  
無事徒勞辛明日，人知跡誰某。

宿磁峽

恆山下

嶽頂松風墮雨絲，叩門喜見杏花遲。  
經過野店驕驄熟，乍種垂楊宿鳥知。  
殘燭漸延山入夢，村酤自爲壁催詩。  
通宵

不住泉鳴峽虎豹都無臥穩時

贈賀家峪山翁

力田渾不羨封侯  
鞞鼓何曾破夢幽  
睡起嶺雲生足底  
客來村酒過牆頭  
卅年緣樹工逃虎  
五夜槌兵健飯牛  
亦有孫曾能識字  
總無一刺到他州

書吳蘭雪舍人再生小草

不知十年別已作再生人  
能同北窗臥尚逐東華塵  
更憶比鄰子齊雲空好春  
稿中簡比鄰諸子有李鳳岡太守齊雲漳州閣名

次臯蕉窗吟思圖

蘇園春老獨無聊  
得句書殘幾葉蕉  
展齒何人侵鹿迳  
一痕涼夢碧迢迢



遮莫仙人住碧城曲廊低檻綠天晴只憐聽雨聽風夜詩  
意和愁一處生

竹畔桐邊記手栽儂家綠錦障樓臺可堪白草黃沙地青

帝行春不到來

徐寅詩只應青帝行春罷閒倚東牆卓翠旗

乙酉八月予叨薦入都兒子

前名

侍值族弟季淵

謙

以需次族子文卿

錫光

叔卿

謝名

德卿

建中

以禮

部試子卿

立中

伯容

敏中

紹先

銘

仲容

秉中

族孫

炳文

世璋

以京兆試同聚一時蓋十二人而予年

最長感歲月之易邁會合之不常觴詠既闌記之

圖畫亦風塵中僅事也

八龍三鳳感商參此會天緣樂不禁阮有北南方共客謝

無大小卻工吟半朝已兆門閭慶白忍能全孝友心努力  
家聲期勿墮祇慚衰髻雪先侵

保陽旅舍邂逅金陵人丁贊琴酒流連遂至達旦口

占別之

知音非必少君子不求知襖被黃雲裏相逢白髮時鄉心  
共燈火秋氣入琴絲何日重杯酒秦淮花滿枝

九日抵紫荆關小憩盤道寺留題予三過此地皆秋

風落木時也

已無黃菊又無傳身在千峯不當遊喜向雄關詩筆健聊  
將佳節馬蹄畱山僧拾栗來供茗吟客聽松自倚樓衰髻  
臨風漫回首十年三度此悲秋

是日宿塔崖驛見菊命酒留題

雲攜兩袖溼難溫  
盡日登高意轉煩  
半嶺書聲黃葉寺  
一鞭峯影夕陽村  
豈期絕徼還逢菊  
不負良辰賴此樽  
醉墨敲斜秋夢冷  
荒雞角角亂柴門

廣昌旅夜得靈邱書

別後無他念  
惟憐二豎侵  
今朝書到眼  
剛道病離衾  
此榻君留夢  
丙子曾宿此處殘燈我獨吟  
相逢明日事  
猶自思難禁

題恆手一編圖張南園爲千波六十初度作

少年好學如初旭  
老年好學如殘燭  
我聞此語自劉向  
向學者因之當共勗  
世上紛紛耽逸樂  
老懶尤因來日促  
先生何爲獨不然  
如恃餘年補不足  
謂人學問無窮期  
燭短益

宜勤補讀我視先生面如玉強者精神炯者目德言巨達  
耄且專六十方如日中學五車雖入便便腹架上猶餘三  
萬軸床穿帷敝幾番更讀竟還應老不覺我慚不學非惰  
慵少小孤貧早奔逐中年疾病生死數有口呻吟手難觸  
父書賣盡寒無擅五十無聞方悔俗前歲居鄰董子園雪  
月寒宵聽唧唧新詩落筆驚千人看執騷壇牛耳獨書城  
局閑久不出一坐直須年過伏我喜南園今北苑寫贈此  
圖工精妙更愛淋漓詩滿幅自題有試教曾元長讀熟將  
來好學似而翁翁喜披圖詩再續

于舍合黃次阜與予小影于已圖中卽和白題韻

此中萬古無離別絕勝神仙縮地方知己何殊共芳筵比

鄰那復羨清漳蛟龍破夢江湖遠予將松菊銜杯歲月長  
干波將歸里賸得方山春寂寞次臯宰萬泉有一回展卷一思  
量

琴隱園詩集卷十五終